

# Far si iert en temps da crisa

«Nus pudessan bain puspè ina giada far si iert», di la gronda durant gentar.

«Mhm», di jau e sper che quest raschie- ni varghia uschè svelto sco ina pluschignada da stad.

«Gea», di la pitschna tut inchantada. «Nus plantain tomatas e frajas.»

«Tomatas n'èn anc mai creschidas tar nus», remartga Eugen Cahenzli.

«Ma tartuffels e salata», di la gronda. «Navair bab, nus faschain puspè si iert?»

«Na», fa Eugen en tun sitg. «Tar nus na guarda tuttina nagin da l'iert. U ch'i pirescha ni ch'ils schnecs mangian si tut.»

«Ma uss avainsa ina crisa d'economia», di la gronda. «Sche ti e la mamma perdais vossas plazzas, vainsa almain salata en l'iert.»

Eugen sa scufla. «Ti has la bella idea...»

Jau, Ludmilla Cahenzli, sai che mes um cumenza uss a referir, tge che sia piazza munta per la famiglia en cumparegliazium cun la miserabla racolta d'iert. Ma jau dun ina bintgunada bain-dosada en il stgain da mes charissim. «Igl è bain bel, sche noss uffants fan quitads per nus e sch'els vulan gidar», di jau e sper che Eugen remartga mia

egliada conspirativa che duess exprimer ch'i sa tracta qua d'ina dumonda d'educaziun.

«Bel?!» Eugen fruscha ses stgain che dola e na remartga nagut. «Dapi cura chattas ti ch'i saja bel da far si iert? E tgi bogna e zercla l'iert?»

«Noss uffants èn gronds avunda per bagnar mintga saira la salata e quest zitgel zerclim n'è bain nagin problem.»

Eugen vul gia dar encunter ch'jau al guard cun mia egliada da veto che munta: Questa discussiun na faschain nus betg avant ils uffants.

«Ma jau na chav betg enturn l'iert», di Eugen e ma guarda cun in'egliada ultima- tiva che munta: Questa giada na fatsch jau betg l'asen. Quai pos emblidar.

Dus dis pli tard sa vestgescha la gronda uschia, sco quai ch'ella manegia ch'ins sa vestgescha, sch'ins lavura en iert. Ella fa sa chapescha era stim ch'i vesia ora anc cool avunda en cas ch'in ami dal frar avess casualmain da vegnir sin visita e da vesair ella a stgavargnand en il terratsch.

«Jau vom uss a chavar enturn l'iert», di ella e sajetta sper mai ora.

Jau ponderesch, sch'jau duess far attent ella ch'i saja dumengia da Pasca e ch'ins na fetschia en famiglias cristifidaivlas betg talas lavurs la dumengia. Ma damai ch'jau hai la devisa ch'ins na duess mai tegnair si ils uffants, sch'els han la bunaveglia da lavurar, e damai ch'jau na vi betg ristgar ch'jau stoppia forsà mezza chavar enturn l'iert, prend jau be ils egliers da sulegl, ma mett en la sutga lunga e guard co che mia figlia traffitga cun badigl e zerclin.

Noss iert è circumdà d'ina saiv da schnecs. Quella aveva Eugen chavà en il terren avant circa diesch onns. Nus n'avain betg cumenzà a far si iert perquai che nus fissan ortulans passiunads ed era betg perquai che nus stuessan exnum avair legums frestgs. Anzi. «Noss uffants ston vesair, co che las pitschnas plantinas creschan e prueschan ord il tarratsch», uschia nossa maxima d'educaziun.

L'emprim onn ha la saiv da schnecs fatg buns servetschs. Gnanca in soli schnecc è sa laschà vesair en noss iert e la salata è creschida tip top – fin las vacanzas da stad. Cura che nus essan turnads da las vacanzas era l'entir iert più vi e nus avain pudì spenderar

mo anc ils tschagugliuns. Il segund onn èn dus schnecc raivids sur in fain or en noss iert. Ina tala prestaziun sportiva avain nus onurà cun laschar en vita ils dus cumpogns. Suenter las vacanzas – quella giada avev jau dà sura ad ina vischina da bagnar l'iert, ma i aveva pluvi mintga di ed ella n'era perquai mai stada a guardar da l'iert – avevan ils schnecc maglià si rubasestrubas tut.

Ils onns sisura han noss uffants pudì observar anc ulteriuras modas, co che plantinas da salata e da legum pon ir a malura: cun stenschentiar en zerclim u entras terratsch stagnira. Perquai avain jau ed Eugen decidì ch'i saja pli prudent, sche noss uffants observian en il futur tar ils vischins, co che las plantinas creschan e prueschan.

«Guarda mamma», cloma la gronda che ha dentant sdrappà ora tut il zerclim. «Qua plantainsa las jarvas e qua ils tartuffels. Sas anc quel onn ch'jau avev chavà ora quest bellezza tartuffel. E ti n'es gnanca stada pronta da cuschinar el!»

Jau dun il chau e ma regord anc bain, co che la figlia aveva chatschà la primavaira in tartuffel en il tarratsch e ditg: «Ord mintga tartuffel creschan almain quin-

desch tartuffels novs. Quai ha la scolasta ditg.»

L'atun aveva la figlia lura chavà or il medem tartuffel e ditg ch'el saja creschì a moda stravaganta. Ella ha vulì ch'jau fetschia maluns per l'entira famiglia cun ses tartuffel.

«Co fissi, sche nus empruvain ina giada da plantar riablas empè da tartuffels?» dumond'jau a moda diplomatica.

«Pertge betg?» di la gronda. «Tartuffels nutrissa zuar meglier en temps da crisa, ma riablas èn era okay.»

Ier sun jau stada a cumprar jarvas e plantinas: peterschigl, rosmarin, timian, salata, urtais, por, zuchettis, zitgas e sems da riablas. Lura hai jau anc vesì ina sprizza, in zerclin, in bel badigl, divers auters urdains nizzaivels, guants da lavur e stivals da gomma ch'èn da preschent gist en moda. Cura ch'jau hai bandunà la stizun da l'ortulan, hai jau g'ì il sentiment d'avair fatg ina bun'ovra. Sche nossas plantinas avessan puspè dad ir a malura e nus racoltassan schuber lidi muz nagut, ha almain l'ortulan fatg ina buna fatschenta e mitscha da la crisa d'economia. Ludmilla Cahenzli